

5. september 2025

UKA 2025/158

Inatsisartut Suleriaasianni § 36 naapertorlugu apeqquaqat aallaavigalugu siunnersuut imaattoq matumuuna saqqummiuppara:

**Inuiaqatigiittut inuttullu ingerlariaqqinnissaq siunertaralugu, nuna tamakkerlugu tamanut tarnikkut katsorsartinnissamut oqaloqateqarnissamullu neqeroorutit annertusarneqartariaqarneri pillugu inatsisartunut apeqquaqat aallaavigalugu oqallisissiasatut siunnersuut.**

(Inatsisartunut ilaasortaq Knud Kleemann, Atassut)

Nunatsinni toqutsinerit, imminut toquttarnerit, kinguaassiuutitigut atornerluinerit, imigassamik ikiaroorartumillu atornerluinerit, sumiginnagaanerillu annertoorujussuupput. Tamavittalu arlaatigut ilamininnguiluunniit inuunitsinni aqquasaarsimassavagut, nalunngisaqarlutalu taakkuninnga aqquasaagaqarsimasunik. Oqarluaannaraanni tamangajatta tarnip pissusaanik ilisimasalimmik oqaloqateqarnissarput pisariaqartikkunarparput.

Massakkut pisortat akiligaannik oqaloqateqartalernissamut neqeroorutit annikippallaarujussuarput. Aatsaallu sakkortunerpaamik aqquasaagaqartunut neqeroortoqarsinnaasarluni. Imaapporlu, nunatsinni inuit amerlanerpaat uummammioqarneq trauminik sulisuliarineqarsimanngitsunik. Nunasiaataasimaneq annertuumik sunniuteqarsimagaluartoq, inunnut ataasiakkaanut suliarineqarsinnaasoq tassaanerupput nammineq inuttut aqquasaakkat, akornatsinnilu pisut alianartut.

Piffissanngorluinnarpoq inuttut tarnikkut peqqissuseq politikkikkut aqutissiuunnissaa. Politikkikkullu akisussaaqataasariaqarpugut. Atassummiillu upperivarput inuttut ingerlariaqqissinnaalerutta aamma nunarput ilorraanut ingerlajartulissasoq, immitsinnullu napatissinnaanerput annertusilluni.

Massakkummi takusinnaavarput inoqatigut qanoq kamassaqaartiginersut, inoqatiminnut nakkarsaasut, facebook aamma nutaarsiassaqaartitsiviit ammaannarlugit ersarippoq pisariaqaartitsineq qanoq annertutiginersaq.

Apeqquallu uaniilerpoq: Qanoq iliorutta inoqatigut annertunerujussuarmik periarfississinnaavagut ikiortillutik imminnut suliarinissaannut? Aningaasat qanoq annertutiginersut illikartissavagut? Inulerisut amerlanerujussuit qanoq pissarsiarissavagut? Tarnip pissusaanik ilisimasallit avataatigut allat suut atornerqarsinnaappat? Coaching, psykoterapi allallu suut eqqaaneqarsinnaappat?



Uagut kalaallit angerlarsimaffimmi inuiattullu ajornartorsiutinik matoorivallaarsimassagutta piffissaalerpoq ammarluta anniaatigut suliaralugit eqqartorsinnaalernissaat. Tassa aqqutissarput. Tassa siunissami nammineernerulissutissarput.